

20/10/1998

Awas kapitalis bentuk baru: PM

Kadir Dikoh in Tokyo

TOKYO, Isnin - Malaysia mengingatkan negara membangun lain supaya mengawasi dan lebih berhati-hati supaya tidak terperangkap dengan fahaman kapitalis Barat dalam bentuk baru menjelang abad ke-21.

Datuk Seri Dr Mahathir Mohamad berkata, bentuk kapitalisme seperti pengaliran bebas modal, ketiadaan kawal selia pasaran dan globalisasi digambarkan seperti agama baru serta satu-satunya ideologi untuk seluruh dunia.

Menurut Perdana Menteri, sebarang bangkangan terhadap ideologi itu yang sudah memudaratkan sebahagian negara membangun sehingga kekayaan terhakis serta rakyat papa kedana, dianggap menentang arus.

"Jika kita tidak berwaspada dan tidak menjalankan tugas membangunkan negara secara serius, kita mungkin dijajah semula," katanya pada sidang pleno pertama pada Persidangan Antarabangsa Tokyo mengenai Pembangunan Afrika (TICAD II) di sini hari ini.

Dr Mahathir sebelum ini dianggap sebagai pemimpin dunia ketiga yang mempromosi kerjasama Selatan-Selatan dan seperti kata Duta Besar Malaysia ke Jepun, Tan Sri Khatib Abdul Hamid, ucapan Perdana Menteri memang ditunggu-tunggu perwakilan pada sidang itu, terutama dari negara Afrika.

Perdana Menteri berkata, kapitalis baru berkeras menyatakan mengenai hak modal untuk pergi ke mana saja dan bagi membentuk semua kerajaan mengikut imej mereka sendiri.

"Tiada siapa harus berbuat sesuatu untuk menghalang pengaliran modal melepasi sempadan. Mereka yang menentang pengaliran bebas seumpama itu akan dianggap sebagai tindakan yang bertentangan.

"Diakui, pengaliran bebas modal boleh membantu menambah kekayaan negara miskin. Dengan itu, banyak negara miskin mengalukan modal asing dalam bentuk pelaburan langsung asing (FDI). Malah negara miskin nampaknya maju dengan peningkatan kemasukan modal asing.

"Apa yang negara membangun tidak sedar ialah modal itu juga mengalir keluar secara bebas dan cepat. Apabila ini berlaku, kekayaan akan terhakis serta merta. Ketika abad ke-21 menuju pada penghujungnya, muka mesra kapitalisme, sudah lenyap.

"Nilai mata wang dan harga pasaran saham yang merudum apabila modal ditarik keluar dengan pantas, merosakkan hampir semua kekayaan kebanyakan negara membangun. Selain ekonomi jatuh, kestabilan politik dan kesejahteraan rakyat turut terjejas," katanya.

Rantau ini dilanda kegawatan ekonomi sejak Julai tahun lalu dengan Indonesia, Thailand dan Korea Selatan terjejas teruk sehingga terpaksa meminta bantuan Tabung Mata Wang Antarabangsa (IMF).

Malaysia juga tidak terlepas daripada krisis itu dan terpaksa memperkenalkan dasar tukaran asing secara berpilih dan menetapkan kadar ringgit pada RM3.80 berbanding satu dolar Amerika mulai awal bulan lalu, bagi mengekang kegiatan spekulatif dan manipulatif terhadap ringgit serta pasaran saham.

Dr Mahathir berkata, berikutan serangan ke atas mata wang dan pasaran saham di negara Asia Timur yang sebelum ini kaya, negara terbabit kini dibelenggu kemiskinan dan tertekan.

"Di mana dahulu kekayaan, di mana sebelum ini kestabilan politik dan sosial; kini kita lihat diambil secara melampau, digawat dan ungkapan mengelirukan. Kerajaan yang sebelum ini merancang keajaiban pembangunan ekonomi, sekarang dijatuhkan dan ditukar dengan kerajaan yang tidak dapat

berbuat sesuatu dengan lebih baik.

"Jika demokrasi berada di laluan, ia juga mesti diketepikan. Malah, kerajaan yang dipilih secara sah mesti membenarkan diri mereka didisiplin oleh kuasa pasaran. Maknanya, yang kaya dengan pelaburan bilion (dolar) dalam dana, dengan rakus memasuki perdagangan mata wang dan menyerang pasaran saham.

"Ini adalah dunia alaf baru. Negara-negara membangun harus berhati-hati," katanya.

(END)